

談異

埽葉山房石印

卷八

談異卷七

伊園漫錄

談異僅四卷頃續為五卷欲更益之而出都事迫乃選耳郵中所載以附益之耳郵者羊朱翁所作蓋采薇之先輩也此行方將見之當不以我為郭象爾凡又二卷

馮孝子

馮孝子佚其名太倉州之老閘鎮人少孤貧傭耕以養母亂後無田可耕乃行乞於市得錢則市酒肉以進而歌俚曲以侑之同治六年母卒乞得義冢地并其父柩合葬之日則仍出行乞夕即於墓旁宿焉每日必攜數石以歸環墓成垣自結草廬寢處其下後數年無病卒鄉人即葬之於其所廬處知州方公傳書立碣表之曰馮孝子墓春秋二百四十年人材極盛而開卷即載穎考叔事表純孝也余研經餘暇偶掇拾見聞成斯筆記而首以馮孝子事亦庶幾左氏之義夫

木工陶某

木工陶某金陵人年甫四歲值粵賊陷城父為所擄母子相依幸而無恙大亂既平仍設肆於城中至同治甲戌陶年二十五矣忽有老翁攜瞽婦至門乞食與之錢不去熟視陶曰爾非陶姓乳名某者乎陶問何以知我翁曰爾乃吾子也陶呼母出視果其父因扶之入拜問由來則始而被擄北行後又流轉至川陝今自陝歸也解腰纏出銀數錠皆累年貿易所得恐途中遇盜賊偽為寔人耳瞽妻則其續娶者也因大歡慰親黨畢賀夫兵亂以來父子夫妻離散者多矣此家乃得完聚意其有陰德乎

金陵一僧

金陵一僧持戒律頗嚴一日有貧子來見其舊鄰也泣而言曰老母不食三日矣僧憐之贈以數金而去去不復來僧亦忘其事居數歲僧忽病恍惚見神人責之曰汝為僧何乃殺生行且入地獄僧覺而自念久斷葷血奚有殺生之事正疑訝間鄰子復來還金如所贈數曰蒙吾師之惠麤得溫飽矣問所業曰為屠僧大驚告以所夢曰子誤我矣鄰子亦驚即偕至佛前懺悔誓不復屠并願放生百萬以贖前罪是夜僧忽夢人以涼水洒之病即愈鄰子後亦為僧夫授

人以刃人即以其刃殺人歸罪於授刃者可也予人以卮酒人即以其酒酖人不得為予之酒者之罪也僧以金贈鄰子宣知其將為屠哉神之責僧似乎太刻若然人無敢以金贈人者矣是阻人為善也然僧不病不夢鄰子必終為屠是神之刻責僧正神之曲成鄰子也意其人亦有夙根神不欲其墮落故轉輾為此以警覺之歟

某乙

某乙性陰險而有幹才善事某甲甲信任之使司出內無所苟甲且死以妻子託乙乙涕泣自任甲死經營其後事不遺餘力人皆稱乙之賢而歎甲之知人也甲繼妻年尚少而貌甚陋乙託詔白家事出入閨闥多方誘之遂為所染由是益見信任乙遂大肆其所欲為盡去其舊人而以私人易之居數載甲之貲財大半歸乙乙遂託故亡去或勸甲妻宜訟之官甲妻內媿弗問也乙遷居他縣為富人然無子止一女與中表某丙通遂偕逃丙故無賴貪重金鬻女於娼家女有姿色在風塵中頗有聲一日有少年來留信宿極相得私訂嫁娶少年窘於財不能數來女恒以他客金私助之乙自失女後鬱鬱不樂無何發病死

乙妻思女甚遣人四出訪求知女所在以金贖歸將與論昏女以所私訂者告乙妻問姓氏鄉里即某甲子也憮然曰爾父當日實負彼不圖今日爾以身報之遂致意甲妻甲家既中落子年長未娶聞之亦良得遂使其子就姻於乙家彌月之後挈其妻并以乙妻及乙之所有盡歸其家噫乙巧矣烏知造物者之更巧也

李氏婦

維揚李氏婦早寡以紡績自給有子甫九齡同邑富人某豔其色而無以自通乃重賂其鄰使為閒會其子將出就傅鄰人以告某曰是有機可圖也乃築精舍於其旁側移子弟於其中延師課讀宣言曰欲入塾者勿距使鄰人以告婦極言其便婦乃使子往讀某善遇之頻以飲食餽遺一日出十數金相贈曰聞子家徒四壁立願以此少佐饘粥子持歸白母婦曰幣重言甘得毋誘我乎乃使其子往謝曰極感長者厚意母當踵門拜謝某則大喜乃使其子出金還之曰母性多疑此不敢受某又爽然若失子歸備言其狀婦歎曰是可得其情矣明日戒子勿往某自來招之婦使其子謝曰子之惠愈厚子之過愈大矣絕子所

以報子也某慚而退此婦不特以禮自持其智識亦足多矣

救吞烟方

衛靜瀾中丞曰余披覽案牘見服生鴉片隕命者幾於無日無之蓋此物近來所在皆有非如砒石等毒物必購求而得也有一方可救之宜廣為傳播其方用雄黃二錢雞蛋青一枚生桐油一兩河水調勻灌服

朱了頭

朱了頭者婁縣農家子也家本赤貧又熒熒無所依日行乞於市咸豐辛酉歲粵賊自嘉祥趨楓涇遇之劫與俱去朱曰我丐也既無錢財自贖又無一執可供爾用何劫我為賊曰汝既丐也饑寒之困甚矣從我去不憂不富貴朱怒曰我惟甘飢寒故丐耳否則為竊為盜胡不可乎我不為竊為盜乃從爾等作賊乎抗聲大罵遂見害嗚乎如朱了頭者可謂有古烈士風矣

何明達

何明達桂林人商於嶺南挾貲數千頻年折閱耗其大半旅况無聊偶作狹邪游至一所曰巢雲別館有妓名翠蓮頗楚楚有致何流連久之忽見一婦自簾

外過淡妝素服丰韻天然何見而好焉倩翠蓮為之先容翠蓮曰是必無成問何故曰伊因家難鬻身於此有能拔出污泥中者則委身事之若視作路旁柳伊不屑也何曰若然此女大有志節宜詢其顛末乃呼問之婦自言譚氏夫廣西人姓王名基客游至此娶妾甫兩載因事被逮於官非百金不能出獄妾念夫婦之義自鬻以拯之夫出囹圄妾墮火坑矣言已泣下何曰爾夫與吾同鄉吾不忍其家室流離但不知爾夫已西歸否曰聞猶未也何乃辭出竟訪得其夫助貲使贖婦以歸市井細民有此高行雖士夫或不及矣

陳朝贊

陳朝贊江西南安府人談者失記其縣家巨富止一子已抱孫矣陳於生日置酒召族人共飲語之曰某幸藉先業加以積累今擁貲三十餘萬矣多藏厚亡非所願也願留奇零之數以贍妻孥其二十萬歸始祖祠中具十萬歸支祖祠中歲入其息仍以三分之一歸吾子孫恐子孫或不能守吾業仍可藉此為生也其三分之二以供春秋祭祀之需族之人冠婚喪葬咸有助孀者孤者廢疾者貧不能存者咸有養歸始祖祠者徧及同族歸支祖祠者惟及同支以賢且

才者一人司其事雖一隴之地不得私鬻即以吾今日之言為息壤矣聞者咸起拜曰盛德事也但不知翁之子以為何如子亦矢言惟父命是從議遂定夫金穴銅山終歸於盡陳翁此舉非獨高義抑亦明智也擁三十萬之貲於一家不三十年必盡矣今推之於一族而仍使歸其所入三分之一則是使子孫長有十萬也老子曰既已為人己愈有既己與人己愈多其是之謂乎

貞女王蕙芳

貞女王蕙芳常州人父遭兵亂挈家避滬瀆遂家焉貧不能自存乃鬻女於王姓者為女時女甫四歲及長丰姿秀麗嫻習女紅王頗愛之無何王卒其妻舊居北里搔頭弄姿非良婦也攜女再嫁女心非之而不敢言其後夫素有登徒子之名見女美屢挑之女懼不免於同治癸酉歲二月十三日夜縊而死此事誘與拒兩無實迹女雖死不得以貞女旌因紀大畧冀不泯耳

落地開花礮

落地開花礮其礮子雖年久尚能炸裂鄉民拾得者因其封口處有金皮貪取其金每致傷命甲戌正月上海瀏河鎮東洋子涇橋鑛工陳小弟因新歲負人

博進無以償恩同治元年七月中官軍開放落地開花礮有礮子落其地陳小弟埋之土中久思鑿取其金未敢措手至是已歷十三年久在土中必受潮溼計必無礙矣乃掘出用斧鑿取金皮忽然炸裂陳頭面俱焚左手打在數里外楊樹上室中一老婦一童子均轟死軍興以來官軍用落地開花礮無往不利其礮子遺落者所在有之願得者以此為鑒勿貪小利而致大害也

黃岡縣易翁

黃岡縣易家坡有易翁者夫婦二人老而無子止生三女長次皆適人惟幼女在室翁死母女相依為命每撫女歎曰恨汝非男子也年十九而嫁夫家甚貧故恒居母家癸酉十一月初十日風雨大作女偶立門前為狂風捲去母偵探無蹤三日後忽自返問所往茫然也而下體已化為男母徧告族人驗之信乃出錢七十千與夫令別娶妻女易釵而弁已聘王氏女為婦矣晉定公二十五年西山女子化為丈夫與之妻能生子事見開元占經引汲冢紀年然則此事自古有之不足異也

高要鄉宦

廣東高要縣一鄉官曾練民兵備土寇殺人頗多癸酉九月膝生一瘡初僅如錢久而益大有目有口癰似人面一日忽出聲曰我曾迪也未嘗作賊因有表兄在賊營作廝養卒我往視之留我一飯汝便以為通賊枉殺我今得請於神決不汝恕也每出一語痛徹於心家人多方祈禱不愈召其父母至乃不出言父母去而聲又作曰此必報之讎父母不能代解也月餘竟死觀此乃知佛書載袁晁事竟非虛語

陳宗器

順德陳宗器商於南雄州性好濟人之急有某甲者家甚貧父病年餘盡鬻其所有以供醫藥而病不瘳甲語其妻曰父病殆矣不忍坐視其死奈何妻曰家中無物可鬻惟鬻我耳甲曰父子夫婦並列五倫豈可偏廢妻曰事有輕重君宜權之甲曰以貧故使卿至此我有何面目立於人世妻曰妾自有不辱之法問何法曰死也某曰若然父未必生而先置卿於死矣妻曰君不忍妾死乃忍父死乎後父病愈篤不得已如妻言將送其妻於媒氏之家其夜夫婦訣別哭甚哀陳宗器所寓適其鄰也詰得其故贈五十金使無鬻婦甲戌之歲五月三

日陳長男婦孿生二子次男婦亦舉一子一日而抱三孫親朋畢賀其婦翁胡叟謂曰子何修得此殆有陰德乎陳曰陰德不敢言惟有一事生平所最快意者因舉此事以告云

婉如

范某年四十無子止一女名婉如頗婉孌可愛有甥李仙槎五歲而孤偕其母以歸與婉如年相若交相憐也仙槎性柔和范妻亦喜之呼為李郎仙槎母將死泣謂范曰吾惟此子恨不見其娶婦婉如我所愛也異日無令歸他族吾死目瞑矣仙槎既長范子千金使營什一利而仙槎不善經營數年折閱殆盡范因憾之寢前議仙槎聞之仰藥死婉如亦縊以殉范大悔恨合葬之

徐福寶

常州一鄉鎮曰橫林有徐福寶者以搖航船為生性好善鄭姓一孀婦死無以殮其子在溧陽往返必五六月天又酷暑不能待徐出已錢殮之錢不足又貸之其鄰焉庚辛之亂徐一女止九歲為亂兵掠去徐轉徙至滬上仍操舟楫一日偶觸一巨舟碎其玻璃窗舟人責償舟中一官人憐其老為之排解乃薄責

之曰汝亦老於舟矣何不解事徐曰吾慣搖內河航船江上風波非所習也官人聞之熟視徐曰汝非常州鄉人乎曰然問何姓名曰徐福寶官人遽出延之登舟曰吾婦翁也亦吾恩人也吾即鄭氏子吾婦即翁女也先是徐女被掠因幼故未失身轉輾至鄭所鄭時已以軍功得右秩矣知為徐女感念殯母之恩即以為妻妻囑訪父耗茲奉差至滬適以觸舟相遇也為善無不報觀於徐事信矣

黃生

閩中黃生富家子也年十五六翩翩如璧人忽得狂疾歌哭不倫自食其穢夜或縱火燒屋家不能防乃於山中構屋數椽使居之守以健僕久之益憔悴無人狀其所聘林氏女父母欲絕其婚女不可曰未婚而婿膺惡疾女之命可知矣從一而終萬無他議與其老死閨中為父母累不如與狂夫同處空山猶得稍盡婦職也父母初不許言之益堅乃如其志與婿居山饑飽寒煖調護維謹一日同坐石上忽溪中有魚躍出長二尺許其首類犬夫即取食女力阻不聽竟食盡越宿病若失翁姑聞而喜甚迎歸成禮焉山海經云諸懷之水多鮎魚

食之已狂黃生所食豈即此歟殆由程女采芣之歌感動幽明故得此靈藥非偶然也

他書中有類此者疑為褒點今竟有之為之一快

雷

自上海西去一百四十里地名楊店泊有礮船船中一勇至村民家強姦一婦勇去婦媿見其夫縊而死薄暮夫歸見婦死不知其故因婦素賢悼之亦縊死次日母歸見子婦俱死痛甚又念老無所依亦縊死時天無片雲忽風雷大作提此勇至婦門外擊死三人皆蘇同治甲戌五月朔事也

李元高

香山李元高李元祥兄弟也兄有四子而貧弟富無子兄以一子為弟後弟不欲甲戌四月弟他出其婦舉一男嫂謬曰女也不如棄之婦方昏眩漫應曰諾嫂遂挈兒出棄之山中家有黃犬隨之往銜草覆之歸而銜兄衣吠信信兄方駭怪忽雷電大作若欲下擊嫂懼言其實兄隨犬往抱兒歸而嫂竟震死人不

如犬宜其為天所誅也

蔡姓婦

上海浦東有蔡姓者喜食鱸魚日買十數尾付子婦治之婦不忍每頓必取數尾縱之一日止五尾婦逸其二翁覺其少覓魚頭三而已詰婦婦不能對翁怒投以羹盃中要害竟死停屍未殮忽有鱸數千尾不知所自來旋繞婦屍數匝良久乃去僉謂鱸雖微物亦知感恩既知感恩亦知報怨矣客因言蘇州舊有一麵店以鱸魚麵得名日殺無數有傭工憐之每日必縱十數尾偶為主人所覺沃以釜中沸湯徧體糜爛無生理其夕忽有鱸魚數千盤旋其身覺涼沁肺腑次日傷處全愈矣主人感其事為易業焉此兩事相類但不知彼翁於婦死後亦知悔懼否

九華山營卒

咸豐乙卯歲江蘇巡撫吉公駐軍九華山一營卒與附近之農家女通許以為妻已有身矣及免身父詰得其故邀卒議婚時卒已以軍功得六品翎頂自念不日可得官農家女非偶也堅不承父歸詈其女女棄兒自經死一夕營卒夢有材官持軍符趣之去見一白髮老翁其後立一女子手抱嬰兒即所私農家女也大駭材官問曰是否老翁顧問女女曰是卒悸而覺明日賊至出隊禦之

同伍皆無恙此卒為賊支解死

姑孰兩孝女

姑孰曹氏兩孝女長曰靜宜自幼許嫁姚氏因兵亂阻隔及亂定姚氏子來為贅婿居久之始知其已娶妻生子矣父母怒責婿無禮靜宜曲為解之姚氏子羞憤去遂絕靜宜居家事父母維謹并以母病代操家政咸井井焉婉宜者其第三妹也幼慧其讀書過目成誦父母奇愛之苛於擇壻故未許人也同治七年父卒婉宜誓以身殉家人以母在勸止之乃與靜宜長齋奉佛共誦金剛經為亡父資冥福無何母又卒二女乘人不備同時仰藥死靜宜有臨終留別兄弟書曰妹不幸為女子身自有知識即念女子同受罔極之恩而獨無以為報深覺歉然稍長見母有痰疾發無定時必有人晝夜經心方免不測誠恐一朝遠嫁不得侍奉母疾而幼字姚氏親命難違無術分身焦思萬狀及贅婿後欲令別置媵妾以便他日歸甯天幸其先已娶妻並生子女維時眾歎遇人不淑咸譏士也無良而妹獨欣天假之緣得遂養親之志是以力阻正名之議安心在家侍奉滿冀雙親壽享期頤永叙天倫之樂何圖天降鞠凶慈父見背喪服

未終老母又染沉痾殆將不起嗚乎吾父吾母既違定省於堂前生佛生天誓必相從於地下從此色笑常親亦復何恨惟念在室養親義非姚氏之人生事死殉可謂曹門之女所存聘金簪二枝望即檢還姚氏永斷葛藤以明決絕三妹於父歿之日百計求死不得此番恐亦不免矣哀哉兄弟疊遭大故雙折連枝悲傷之情不堪設想竊有一言勸慰者泉下庭闈有妹等侍奉足可放心兄弟等子職所當盡者不徒在哀毀二字但能修身訓子積德顯親自足慰父母之靈而妹等亦從旁含笑二妹已為孔氏婦有其當盡之職務宜節哀自愛勿蹈非禮死別須臾臨穎愴然

吳璣香

吳璣香者湖南沅陵士族女也幼孤依其舅寓居武陵咸豐四年粵寇至舅家咸避去獨女隨其舅居危城中城破女謂舅速去舅曰若母以汝託吾吾舍汝去何面目見汝母地下乎女曰甥累舅非一日今危急之際豈忍復以羸軀為舅累哉入室雖經死越數日賊入其居時方酷暑訝其屍久而不殯解視之衣皆縫紉胸前得一詩云城破身難辱途危志愈貞千秋名節重兩字死生輕未

報君親德羞懷兒女情願將三尺組畢此百年身

油煤人

油煤人傳者諱其姓名四川巴縣武生也恃其拳勇武斷鄉曲無惡不為一日夢為冥卒攝去見冥王甚怒歷數其罪命罰作泥鰌使嘗砧礪鼎鑊之苦此人懼忽有二老人叩頭階下為乞恩王沈思曰此子雖萬惡事母尚孝且汝二老皆善人也不可無後然不可令其徒返乃命獄卒以鐵叉叉入油鑊中頃刻肌膚糜爛臟腑焦灼苦不可言一時許乃出之王曰汝還陽間宜告人以此苦使為惡者知懼若有一二人改過遷善即汝功也可以贖罪矣命二老引之出二老蓋其祖父也導之至家忽如夢醒則死一晝夜矣月餘乃能起而自首以下乾枯如油煤者因自號為油煤人踰年生一子乃使人舁行鄉邨俾眾人聚觀且自道其事以警眾焉徐芳諾皋廣志載崇禎末濬縣諸生馬一元死而復蘇云冥中主者使其盡縷生平之惡以誠於世因盡條其夙愆書而梓之名馬氏誠世篇事與此類

李繩武